



Inatsisartunut ilaasortaq, Laura Táunâjik
Siumut

Pisortanit ikiorsiissutit pillugit § 37 naapertorlugu apeqquutit

27-01-2017
Sagsnr. 2017 - 1709
Akt ID. Nr. 4440784

Qujanaq pisortanit ikiorsiissutit pillugit § 37 naapertorlugu apeqquutinut.

Postboks 260
3900 Nuuk

Innuttaasut tamarmik atugarissaarnissaat isumagineqartussaavoq. Tamanna ilaatigut pi-sarpoq pisortat tunniuttagaannik, aamma pisortanit ikiorsiissutinik tunniussisarnikkut. In-nuttaasut sumik arlaannik pissuteqartumik imminnut pilersorsinnaanngitsut, taamaattu-millu pisortanit piffissami sivikinnerusumi sivisunerusumiluunniit ikiorneqartariaqartut inuiaqatigiisugut isumagisassaraagut, innuttaasoq imminik ilaqtaminillu pilersuisin-naalerserlugu. Tamanna Naalakkersuisut isumaginninnikkut politikkianni tunngaviuvoq pingaartaq.

Tlf. (+299) 34 50 00
Fax (+299) 34 66 66
E-mail: iian@nanoq.gl
www.naalakkersuisut.gl

Pisortat ikiorsiissutaat isumaginninnermi tunniuttagaapput pingaarutillit, innuttaasup im-minik ilaqtaminillu pilersuisinnaannginnermini ikiorneqarnissamik qinnuteqarsinnaanis-saanik qulakkeerisussat. Pisortat ikiorsiissutaat ataasiakkaanik nalileereernikkut, tassa innuttaasoq aappaqarpat inooqateqarpalluunniit kiisalu meeraqarpat taakku ilanngullugit eqqarsaatigalugit tunniunneqartarput. Aamma sulileqqinnissamut, piginnaanngorsaqqin-nissamut allatulluunniit suliniuteqarnissamut, innuttaasup imminut pilersorsinnaalernis-saanik ikiuutaasinnaasunik iliuuseqarnissamut pilersaarusiortoqarsinnaavoq.

Innuttaasut pisortanit ikiorsiissutinik pissarsisartut ilaqarput imigassamik aalakoornartu-mik atornerluisuusunik allanilluunniit pinngitsuuisinnaannginnermik ajornartorsiuteqartu-nik, innuttaasup pisortanit ikiorneqartuarnissaanik kinguneqartunik. Taamaattoqarnera ilaqaataasunittaaq eqquisarpoq.

Tamanna suliassaavoq Naalakkersuisut pimoorussaasat.

Innuttaasut atugarliortut Naalakkersuisunit immikkut suliniuteqarfigineqarput, taamaattu-millu suliassaqarfanni assigiinngitsuni, aamma ilaatigut isumaginninnerup iluani suliniuti-nik, neqeroorutinik il.il. periarfissarpassuaqarpoq, soorluttaaq innuttaasut inuunerminni atugarliortut, aamma innuttaasut atornerluisuusut suliniuteqarfigineqarnerat annertusar-niarlugu Naalakkersuisut kommuninik qanimut oqaloqateqartartut.

1. Pisortanit ikiorsiissutit pillugit Naalakkersuisut sunik pilersaaruteqarpat? Iluarsiissutissanik qanoq ittunik suliaqassamaarpat ?

Akissut:

Naalakkersuisut 2016-imiit 2018-imut naalakkersuisooqatigiinnissamik isumaqatigiissu-taanni allaqqavoq Naalakkersuisut pisortat ikiorsiissutigisagaannik aaqqissuusseqqinni-artut. Naalakkersuisut aaqqissuusseqqinnissani aggersuni anguniagaat pingaarneq tas-saavoq naligiinnerulernissaq.

Aaqqissuusseqqinnissaq sunik imaqassanersoq sulii aalajangerneqanngilaq, naalakkersuisooqatigiinnissamillii isumaqatigiissummi allaqqavoq, innuttaasup pisortanit tunniunneqartartunik pissarsisinnaanissaanut piumasaqaatit maannakkornit amerlanerussasut.

2. Pisortanit ikiorsiissutit ukiumoortumik aningaasanngorlugit tunniunneqartartut qanoq amerlatigippat?

Akissut:

Naatsorsueqqissaartarfiup internetikkut nittartagaani takuneqarsinnaavoq pisortat ikiorsiissutaat 136 mio. kr.-it sinnillit 2015-imi tunniunneqarsimasut.

3. Naalakkersuisut pisortanit aningaasanik rekvisitionit (pappialat) atorlugit tunniussisoqarsinnaanera eqqarsaatigisimavaat?

Akissut:

Pisortanit ikiorsiissutit pillugit Inatsisartut peqqussutaanni § 17, imm. 2 naapertorlugu pisortat pilersuineranut akiligassanullu aalajangersimasunut ikiorsiissutaat aningaasanngornagit tunniunneqarsinnaapput imaluunniit akiligassiisumut toqqaannartumik akileneqarsinnaallutik, pissutsit immikkut illuinnartut atuutsillugit.

Tassa imaappoq, kommunit pisortat ikiorsiissutaannik rekvisitionikkut, soorlu nerisassanik, atisassanik pinngitsoorneqarsinnaanngitsunillu allanik pisissutissanik tunniussinissamut maanna periarfissaqareerput.

Inussiarnersumik inuulluaqqusillunga

Sara Olsvig